

**CONSELLERÍA DE AGRICULTURA,
GANDERÍA E MONTES**

Orde do 18 de xuño de 1993 pola que se aproba o regulamento da denominación de orixe Queixo Tetilla e do seu consello regulador.

Por Orde do 18 de marzo de 1992, modificada pola Orde do 16 de marzo de 1993, a Consellería de Agricultura, Gandería e Montes recoñeceu a denominación

de orixe *Queixo Tetilla* e nomeouse o seu consello regulador provisional. Entre as funcións asignadas ó dito consello figuraba a redacción do proxecto de regulamento particular da denominación, que elevaría para a súa aprobación, á Consellería de Agricultura, Gandería e Montes.

En consecuencia, unha vez cumprida a dita obriga, de acordo co disposto no artigo 30.1º 3 do Estatuto de autonomía de Galicia, e en uso das competencias que me confire a Lei 1/1983, reguladora da Xunta e do seu presidente,

DISPÓÑO:

Artigo 1º

Recoñécese con carácter definitivo a denominación de orixe *Queixo Tetilla* e apróbase o seu regulamento co texto articulado que figura como anexo da presente orde.

Artigo 2º

Dispónse a publicación da presente orde no *Diario Oficial de Galicia*, figurando como anexo desta o regulamento da denominación de orixe *Queixo Tetilla* e do seu consello regulador, así como a súa remisión ó Ministerio de Agricultura, Pesca e Alimentación para os efectos da súa ratificación e defensa nos ámbitos nacional e internacional.

Disposición transitoria

O consello regulador provisional da denominación de orixe *Queixo Tetilla* asumirá a totalidade das funcións que lle corresponden segundo o capítulo VII deste regulamento, continuando os seus compoñentes nos seus cargos respectivos ata que o dito consello regulador quede constituído de acordo co establecido no artigo 31.

Disposicións derradeiras

Primeira.—facúltase o director xeral de Producción Agropecuaria e Industriais Agroalimentarias para dictar as normas precisas para o desenvolvemento da presente orde.

Segunda.—A presente orde entrará en vigor o día seguinte ó da súa publicación no *Diario Oficial de Galicia*.

Santiago de Compostela, 18 de xuño de 1993.

Tomás Pérez Vidal

Conselleiro de Agricultura, Gandería e Montes

ANEXO

Regulamento da denominación de orixe *Queixo Tetilla* e do seu consello regulador

Capítulo I

Xeneralidades

Artigo 1º

De acordo co disposto na Lei 25/1970, do 2 de decembro, e no seu regulamento, aprobado por Decreto

835/1972, do 23 de marzo, no Decreto 3.711/1974, do 20 de decembro e no Real decreto 728/1988, do 8 de xullo, quedan protexidas coa denominación de orixe *Queixo Tetilla*, os queixos que, reunindo as características especificadas neste regulamento, cumprisen na súa produción, elaboración e maduración tódolos requisitos esixidos neste e na lexislación vixente.

Artigo 2º

O *Queixo Tetilla* é o obtido a partir de leite de vaca, producida na área xeográfica sinalada no artigo 5 deste regulamento e obtido nas condicións xerais que establece a lexislación vixente e as particulares sinaladas neste regulamento.

Artigo 3º

1.—A protección outorgada esténdese ó nome da denominación de orixe *Queixo Tetilla* e a súa tradución para lingua galega.

2.—Queda prohibida noutros queixos ou produtos lácteos a utilización de nomes, marcas, termos, expresións e signos que, pola súa similitude fonética ou gráfica, poidan inducir a confusión cos que son obxecto deste regulamento, aínda nos casos de que vaian precedidas polas expresións «tipo», «estilo», «gusto», «sabor», «elaborado», ou outras análogas.

Artigo 4º

A defensa da denominación de orixe *Queixo Tetilla*, a aplicación do seu regulamento, a vixilancia do seu cumprimento, así como o fomento e control da calidade dos queixos amparados, quedan encomendados ó consello regulador da denominación de orixe, á Consellería de Agricultura, Gandería e Montes da Xunta de Galicia e á Dirección Xeral de Política Alimentaria do Ministerio de Agricultura, Pesca e Alimentación, no ámbito das súas respectivas competencias.

Capítulo II

Da produción da leite

Artigo 5º

A zona de produción de leite apto para a elaboración de *Queixo Tetilla* comprende todo o territorio da Comunidade Autónoma galega.

Artigo 6º

1.—O leite que se utilice para a elaboración do *Queixo Tetilla* será leite de vaca procedente das razas frisóna, pardo alpina e rubia galega.

2.—A alimentación do gando responderá ás prácticas tradicionais, sendo obxectivo do consello regulador favorecer e impulsar o aproveitamento directo dos pastos, podendo dictar normas complementarias co fin de que o leite destinado á elaboración de *Queixo Tetilla*, responda ás súas características peculiares.

3.—O consello regulador fomentará a adopción de técnicas encamiñadas a mellora-la produtividade dos animais e a calidade do leite.

4.—As instalacións para a explotación de gando vacún dedicado á produción de leite con destino á elaboración de *Queixo Tetilla*, cumprirán as condicións establecidas pola lexislación vixente e as establecidas neste regulamento.

Artigo 7º

1.—O leite que se destine á elaboración de *Queixo Tetilla* será o produto natural íntegro, procedente da muxidura de vacas sas e que reúna as condicións que seguen:

a) Non conterà formigos nin conservadores ou produtos medicamentosos que poidan incidir negativamente na elaboración, maduración e conservación do queixo.

b) Terá unha composición de acordo coas características da raza á que pertencen os animais de que proceda e coa estación do ano, cos mínimos seguintes:

Proteína: 3,1%.

Graxa: 3,5%.

Extracto seco: 8,4%.

c) Cumprirá as condicións hixiénico-sanitarias que establece a lexislación vixente.

d) O leite que se empregue na elaboración dos queixos que se van protexer non debe superar, ó comezalo proceso de elaboración, os 18 graos Dornic, podendo engadírselle unicamente cloruro cálcico.

2.—A muxidura realizarase en condicións que garantan a obtención hixiénica do leite.

3.—Unha vez muxido, o leite conservarase na maneira máis conveniente para evita-lo desenvolvemento de microorganismos e a contaminación medioambiental.

4.—A recollida e transporte do leite organizarase de maneira que non se mesture e almacene máis leite có procedente de dúas muxiduras. O transporte deberá facerse nas mellores condicións hixiénicas, ben en cisternas isotérmicas ou frigoríficas ou ben por calquera outro sistema que garanta que a calidade do leite non se deteriore.

5.—O consello regulador viaxará e controlará as operacións de recollida e transporte do leite, podendo dicitar normas para que estas operacións se efectúen sen merma da calidade e nas mellores condicións hixiénico-sanitarias.

Capítulo III

Elaboración e maduración

Artigo 8º

A elaboración e maduración do queixo amparado pola denominación deberá efectuarse en instalacións adecuadas situadas dentro da zona de produción de leite delimitada no artigo 5 deste regulamento.

Artigo 9º

As técnicas empregadas na manipulación do leite e dos queixos, así como o control de procesos de elaboración, maduración e conservación, axustaranse á lexislación vixente e ás prácticas tradicionais, sinaladas nos artigos seguintes, co obxecto de obter produtos da máxima calidade, conservando as características tradicionais dos queixos amparados pola denominación de orixe *Queixo Tetilla*.

Artigo 10º

1.—Coagulación.

A coagulación do leite provocarase con extracto de callo animal exclusivamente e poderanse usar os fermentos lácticos seguintes: *Streptococcus lactis*, *Streptococcus cremoris* e calquera outro que, non modificando as características dos queixos que se van amparar, poida ser aprobado polo consello regulador.

A temperatura de coagulación oscilará entre os 28 e 32 graos centígrados, utilizándose as doses de callo necesarias para que o tempo de callado non sexa inferior a 20 minutos nin supere os 40.

2.—Corte, lavado e recocado do leite callado.

Para que o queixo adquira as características sinaladas no artigo 12 deste regulamento o leite callado será sometido ós seguintes tratamentos:

a) Corte. Para acadar unha granulometría do leite callado aproximada ó tamaño dun garavanzo.

b) Lavado. Con auga natural, para baixa-la acidez do leite callado ata 4 e 6 graos Dornic.

c) Recocado. Lavado do leite callado con auga a temperatura superior en dous graos á temperatura de callado.

3.—Moldeado. Farase en moldes de dimensións e forma adecuadas para conseguirla forma característica e os tamaños que se describen no artigo 12.

4.—Prensado. O prensado farase en prensas adecuadas permanecendo nelas o leite callado durante un tempo mínimo de tres horas a unha presión variable, segundo o tempo de prensado.

5.—Salgadura.—Farase en salmoira, cunha concentración entre 17 e 18 graos Baumé, sendo o tempo máximo de inmersión de 24 horas.

6.—Maduración. Para que os queixos poidan ser amparados por esta denominación, terán un período mínimo de maduración de sete días, contados a partir do remate da salgadura.

Durante este tempo, os queixos serán sometidos ás prácticas de volteo e limpeza necesarias, para que adquiran as súas peculiares características.

Artigo 11º

Queda prohibido para a elaboración de queixos protexidos:

1.—Utilizar calquera tipo de caseinato, leite en pó, calquera clase de materia graxa, incluída a manteiga, e de aditivos non recoñecidos na lexislación vixente e, entre os autorizados, os que non estean expresamente permitidos polo consello regulador.

2.—Calquera manipulación que tenda a modifica-las características da toma.

Capítulo IV

Características dos queixos

Artigo 12º

1.—Ó final da súa maduración o *Queixo Tetilla* presentará as seguintes características básicas:

—Forma: cónica, convexo-cónica.

—Peso: de 0,5 a 1,5 qg.

—Dimensións: a altura será superior ó radio da base e inferior ó diámetro.

Altura:

Máximo: 150 milímetros.

Mínimo: 90 milímetros.

Diámetro base:

Máximo: 150 milímetros.

Mínimo: 90 milímetros.

—Toma: apreciable, fina e elástica, de menos de tres milímetros de espesor; cor amarela pallosa natural e sen balor.

—Pasta: branda, cremosa e uniforme, con poucos ollos e regularmente repartidos; cor branca-marfil, amarelada.

—Recendo: suave, lixeiramente acedo e que en conxunto lembre o leite de que procede.

—Sabor: lácteo, manteigoso, lixeiramente acedo e salgado suave.

—Maduración: mínima de sete días (en condicións normais).

—Porcentaxe de materia graxa: 45% mínimo sobre extracto seco.

—Porcentaxe de proteína: 40% mínimo sobre extracto seco.

—Porcentaxe de extracto seco do 45 ó 50 %.

—Ph do produto rematado: (no momento de expedición) do 5,0 - 5,5.

2.—Os queixos deberán presenta-las características relacionadas no punto 1 deste artigo e as cualidades organolépticas típicas destes, especialmente en canto a cor, aroma e sabor. Os queixos que a xuízo do consello regulador non adquirisen estas características non poderán ser amparados pola denominación de orixe *Queixo Tetilla* e serán descalificados na maneira que se preceptúa no artigo 36.

Capítulo V

Rexistros

Artigo 13º

1.—O consello regulador levará os seguintes rexistros:

a) Rexistro de ganderías.

b) rexistro de industrias de elaboración ou queixerías.

2.—As peticións de inscrición dirixiranse ó consello regulador, xuntando os datos, documentos e comprobantes que en cada caso sexan requiridos polas disposicións e normas vixentes, nos impresos ou do xeito que estableza o consello.

3.—O consello regulador denegará de forma motivada as inscricións que non se axusten ós preceptos deste regulamento ou ós acordos adoptados polo consello sobre condicións complementarias de carácter técnico que deban reuní-las ganderías, queixerías e instalacións de maduración ou curado.

4.—A inscrición nestes rexistros non exime ós interesados da obriga de inscribirse naqueloutros que, con carácter xeral, estean establecidos legalmente, debendo acreditá-lo no momento de solicita-la súa inscrición no rexistro da denominación de orixe.

5.—As empresas que realicen máis de unha fase do proceso deberán ter inscritas as súas ganderías e instalacións nos rexistros correspondentes.

Artigo 14º

1.—No rexistro de ganderías inscribíranse as que, estando encravadas na zona de produción e reunindo as condicións establecidas neste regulamento, queiran destinar toda ou parte da súa produción de leite á elaboración de *Queixo Tetilla*.

2.—Na inscrición figurarán: nome do propietario, arrendatario, termo municipal, número de cartilla gandeira e número de femias reproductoras, e todos aqueles datos que se consideren necesarios para a clasificación, localización e adecuada identificación da gandería inscrita.

3.—A inscrición neste rexistro será voluntaria, o mesmo que a correspondente baixa neste. Unha vez producida esta, deberá transcorrer un período de dous anos antes de proceder a unha nova inscrición, salvo cambio de titularidade, segundo se establece no artigo 11.2º do Real decreto 728/1988.

Artigo 15º

1.—No rexistro de industrias de elaboración ou queixerías inscribíranse as instalacións que, estando situadas na zona de elaboración, o soliciten e que o consello regulador considere aptas para elaborar queixos que poidan optar a ser protexidos pola denominación de orixe.

2.—Na inscrición figurará: o nome do propietario e/ou arrendatario, se é o caso, razón social, localidade e zona de emprazamento, características, capacidade de elaboración, maquinaria, sistema de elaboración e cantos datos sexan precisos para a perfecta identificación e catalogación da queixería.

Para tal fin xuntarase un plano ou bosquexo a escala conveniente, onde queden reflexados tódolos detalles de construción e instalacións.

3.—As industrias de elaboración que posúan outras liñas de produción distintas do *Queixo Tetilla* farano constar expresamente no momento da súa inscrición.

4.—Non poderán elaborarse nas instalacións inscritas queixos que, pola súa forma e características, poidan dar lugar a confusión cos queixos amparados.

5.—As pezas de queixo elaboradas para seren protexidas que non sexan cualificadas poderán ser comercializadas, ben para obter outros produtos, ben para o consumo directo, pero con diferentes distintivos, sempre baixo o control do consello regulador e sen o amparo da denominación.

Artigo 16º

1.—Para a vixencia das inscricións nos correspondentes rexistros, será indispensable cumprir en todo momento cos requisitos que impón o presente regulamento, comunicando ó consello regulador calquera variación que afecte ós datos subministrados na inscrición, cando a dita variación se produza. En consecuencia, o consello regulador poderá suspender ou anular as inscricións cando os seus titulares non se ativesen a tales prescricións.

2.—O consello regulador efectuará inspeccións periódicas para comprobala efectividade de canto se dispón no parágrafo anterior.

3.—Tódalas inscricións nos diferentes rexistros serán renovadas no prazo e forma que determine o consello regulador. No caso particular do rexistro de ganderías, os seus datos deberán ser actualizados tódolos anos na data que se determine.

Capítulo VI

Dereitos e obrigas

Artigo 17º

1.—Só as persoas naturais ou xurídicas con ganderías inscritas no correspondente rexistro poderán producir leite con destino á elaboración de queixo que teña que ser protexido pola denominación de orixe.

2.—Só as persoas naturais ou xurídicas que teñan os seus locais de elaboración inscritos no correspondente rexistro da denominación de orixe poderán elaborar, para a súa posterior maduración e comercialización, queixos con dereito a seren amparados pola denominación de orixe.

3.—Só poderá aplicarse a denominación de orixe *Queixo Tetilla* ós queixos procedentes das instalacións inscritas no rexistro de queixerías que fosen producidos ou elaborados conforme as normas esixidas por este regulamento, e que reúnan as condicións organolépticas de deben caracterizalos.

4.—O dereito ó uso da denominación de orixe en propaganda, publicidade, documentación ou etiquetas é exclusivo das firmas inscritas nos rexistros do consello regulador.

5.—Polo mero feito da inscrición nos rexistros correspondentes, as persoas físicas ou xurídicas inscritas quedan obrigadas ó cumprimento das disposicións deste regulamento e dos acordos que, dentro das súas competencias, dicten a Xunta de Galicia, a Dirección Xeral de Política Alimentaria do Ministerio de Agricultura, Pesca e Alimentación e o consello regulador, así como a satisfacen as exaccións que lle corresponden.

6.—Para o exercicio de calquera dereito outorgado por este regulamento ou para poder beneficiarse dos servizos que preste o consello regulador, as persoas naturais ou xurídicas que teñan inscritas as súas ganderías e instalacións deberán estar ó día no pagamento nas súas obrigas.

Artículo 18º

1.—O consello regulador poderá autorizar ás queixerías inscritas que dispoñan de cámaras de maduración, a coexistencia nestas cámaras de queixos que vaian ser amparados pola denominación de orixe con outros tipos distintos, sempre e cando estes últimos fosen elaborados na propia queixería e a súa forma e características non dean lugar a confusións co queixo protexido. O consello regulador establecerá a normativa que se terá que cumprir, co obxecto de ter un perfecto control destes produtos e garantir en todo momento a natureza e pureza dos queixos protexidos.

2.—As empresas que teñan inscritas queixerías e instalacións só poderán ter almacenados os seus xéneros nos locais declarados na inscrición.

Artigo 19º

As marcas, símbolos, emblemas, lendas publicitarias ou calquera outro tipo de propaganda que se utilice aplicado ós queixos protexidos pola denominación que prevé este regulamento non poderán ser empregados baixo ningún concepto, nin sequera polos propios titulares, na comercialización doutros queixos non amparados pola denominación de orixe *Queixo Tetilla*.

Artigo 20º

1.—Os queixos da denominación de orixe destinados ó consumo irán provistos dunha etiqueta ou contraetiqueta numerada, expedida polo consello regulador, que deberá ser colocada nos propios locais ou cámaras de maduración ó final deste proceso e, en todo caso, antes da súa expedición, de acordo coa normativa que establece para estes efectos o consello regulador e de maneira que non permita unha segunda utilización de tales distintivos.

2.—Nas etiquetas propias de cada elaborador que se utilicen nos queixos amparados figurará obrigatoriamente de maneira destacada o nome da denominación de orixe, ademais dos datos que con carácter xeral determina a lexislación vixente, fixando a data de consumo preferente en 60 días contados desde a data de acondicionamento para a súa expedición.

3.—Antes da posta en circulación de etiquetas das firmas elaboradoras inscritas, xa sexan correspondentes a queixos protexidos ou a queixos sen dereito á denominación de orixe, estas deberán ser autorizadas polo consello regulador para os efectos que se relacionan neste regulamento. Será denegada a aprobación daquelas etiquetas que, por calquera causa, poidan dar lugar a confusión no consumidor. Así mesmo poderá ser anulada a autorización dunha xa aprobada anteriormente cando variasen as circunstancias da súa firma proprietaria, logo de audiencia da firma interesada.

4.—O consello regulador adoptará e rexistrará un emblema como símbolo da denominación de orixe, logo de aprobación pola Consellería de Agricultura, Gandería e Montes. Do mesmo xeito, o consello regulador poderá facer obrigatorio que no exterior dos locais de elaboración e maduración inscritos, e en lugar salientado, figure unha placa que aluda a esta condición.

Artigo 21º

A expedición dos queixos que teña lugar entre firmas inscritas deberá levar un volante de circulación entre queixerías, expedido previamente polo consello regulador na maneira que este determine.

Artigo 22º

1.—O etiquetado dos queixos amparados pola denominación de orixe *Queixo Tetilla* deberá ser realizado exclusivamente nas queixerías inscritas, autorizadas polo consello regulador, perdendo o queixo noutro caso o dereito ó uso da denominación.

2.—Os queixos amparados pola denominación de orixe unicamente poderán circular e seren expedidos polas queixerías e instalacións inscritas, en envases autorizados polo consello regulador que non prexudiquen a súa calidade e prestixio.

Artigo 23º

1.—O queixo coa denominación de orixe só poderá comercializarse se a súa tona conserva as características externas e naturais de maduración. Poderá ser recuberto con emulsión, plástica, transparente e autorizada, pero en todo caso a tona conservará o seu aspecto e cor naturais.

Artigo 24º

O consello regulador viviará en cada campaña as cantidades de queixo amparado pola denominación expedidas por cada firma inscrita nos rexistros de queixerías, para verificarlle a súa relación coas cantidades de leite adquirido e segundo as existencias e adquisicións de queixos a outras firmas inscritas.

Artigo 25º

Toda expedición de queixo amparado pola denominación de orixe con destino ó estranxeiro, ademais de cumprirlas normas establecidas para o comercio exterior de queixo, irá acompañada polo correspondente certificado de denominación de orixe, expedido polo consello regulador, que se axustará ó modelo establecido pola Dirección Xeral de Política Alimentaria do Ministerio de Agricultura, Pesca e Alimentación, sen poder despacharse pola alfóndega as partidas de *Queixo Tetilla* que carezan do dito certificado.

Artigo 26º

1.—Co obxecto de poder controlalos procesos de produción, elaboración e expedición, así como os volumes de existencias e canto sexa necesario para poder acreditar a orixe e calidade dos queixos amparados pola denominación de orixe, as persoas físicas ou xurídicas titulares das ganderías, queixerías e locais de maduración virán obrigadas a cumprir coas seguintes formalidades:

a) Tódolos propietarios de ganderías inscritas presentarán ó consello regulador, na primeira quincena de cada mes, declaración da produción leiteira obtida no mes anterior en cada un dos rabaños inscritos, indicando o destino do leite e, en caso de venda, o nome do comprador.

b) Tódalas queixerías inscritas levarán un libro segundo o modelo adoptado polo consello regulador, no que figurarán diariamente os datos de cantidade e procedencia do leite recibido, número de unidades e peso total dos queixos fabricados e locais de maduración ou cámaras de maduración onde se destinen estes queixos con dereito a denominación de orixe. Así mesmo, presentarán ó consello regulador nos 15 primeiros días de cada mes, unha declaración que resuma os datos do mes anterior que figuran no libro, segundo o modelo que adopte o consello.

c) Tódalas firmas inscritas no rexistro que maduren queixo, levarán un libro segundo o modelo que adopte o consello regulador, no que diariamente anotarán os datos referentes ó número e procedencia das unidades de queixo que inicien o proceso de maduración, o número das que finalizan este proceso e o de queixos que se expenden ó mercado. Igualmente, presentarán ó consello regulador, dentro dos 15 primeiros días de cada mes, unha declaración na que quedarán reflectidos tódolos datos do mes anterior que figuren no libro.

2.—De conformidade co previsto nos artigos 46 e 73 da Lei 25/1970, as declaracións a que se refire o apartado 1 deste artigo teñen efectos meramente estatísticos, polo que non poderán facilitarse nin publicarse máis que en forma numérica, sen referencia algunha de carácter individual. Calquera infracción desta norma por parte do persoal afecto ó consello regulador será considerada como falta laboral moi grave, sen prexuízo da súa sanción conforme a vixente lexislación estatística.

Artigo 27º

1.—O leite e os queixos que por calquera causa presenten defectos, alteracións sensibles ou que na súa produción incumprisen os preceptos deste regulamento ou a lexislación vixente, serán descalificados polo consello regulador, o que supoñerá a perda da denominación de orixe para o lote correspondente, ou a dereito a ela no caso de produtos non definitivamente elaborados.

2.—A descalificación dos queixos poderá ser realizada polo consello regulador en calquera fase da súa produción ou comercialización e a partir da iniciación do expediente de descalificación permanecerán debidamente illados e rotulados, baixo control do consello regulador, ata a súa expedición ó mercado. Os queixos descalificados en ningún caso poderán ser vendidos amparados pola denominación de orixe.

Capítulo VII

Do consello regulador

Artigo 28º

1.—O consello regulador é un organismo integrado na Consellería de Agricultura, Gandería e Montes da Xunta de Galicia como órgano desconcentrado desta, con funcións decisorias en cantas atribucións se lle encomendan neste regulamento de acordo co que se determina nas disposicións vixentes.

2.—O seu ámbito de competencia, sen prexuízo do establecido no artigo 29 estará determinado:

a) No territorial, pola respectiva zona de produción, elaboración e maduración.

b) En razón dos queixos, polos protexidos pola denominación de orixe en calquera das súas fases de produción, elaboración, maduración, circulación e comercialización.

c) En razón das persoas, polas inscritas nos diferentes rexistros.

Artigo 29º

É misión principal do consello regulador a de aplicar os preceptos deste regulamento e velar polo seu cumprimento, para o cal exercerá as funcións que se lle encomendan no artigo 87 da Lei 25/1970, e disposicións complementarias, así como as que expresamente se indican no articulado deste regulamento.

Artigo 30º

1.—O consello regulador estará constituído por:

a) Un presidente.

b) Un vicepresidente.

c) Catro vocais en representación do sector gandeiro, elixidos por e entre os gandeiros inscritos que subministran leite para a elaboración de *Queixo Tetilla*.

d) Catro vocais en representación dos elaboradores de queixo, elixidos por e entre os elaboradores de queixo inscritos nos correspondentes rexistros do consello regulador.

e) Dous delegados da Administración, un deles designado polo conselleiro de Agricultura, Gandería e Montes e o outro polo conselleiro de Industria e Comercio. Estes dous delegados asistirán ás reunións do consello, con voz pero sen voto.

2.—O presidente e vicepresidente serán designados polo conselleiro de Agricultura, Gandería e Montes por proposta dos vocais elixidos para constituí-lo consello regulador, sendo o presidente elixido entre as persoas pertencentes a un dos sectores e o vicepresidente entre as persoas pertencentes ó outro sector.

3.—Por cada un dos vocais do consello regulador designarase un suplente, elixido na mesma maneira que o titular.

4.—Os vocais serán renovados cada catro anos, podendo ser reelixidos.

5.—No caso de cesamento dun vocal por calquera causa legal, a súa vacante será cuberta polo substituto, se ben o mandato do novo vocal só durará ata que se celebre a primeira renovación do consello.

6.—O prazo para a toma de posesión dos vocais será como máximo de un mes contado desde a data da súa designación.

7.—Causará baixa o vocal que durante o período de vixencia do seu cargo sexa sancionado por infracción grave nas materias que regula este regulamento, ben persoalmente ou ben a firma a que pertenza. Igualmente causará baixa por ausencia inustificada a dúas sesións consecutivas ou a tres alternas no período de un ano, ou por causar baixa nos rexistros da denominación de orixe.

Artigo 31º

1.—Os vocais ós que se refiren os apartados c) e d) do número 1 do artigo anterior estarán vinculados ós sectores que representan, ben directamente ou por seren directivos de sociedades que se dediquen ás actividades aquí reguladas. Non obstante, unha mesma persoa natural ou xurídica non poderá ter no consello dobre representación, nin directamente nin a través de firmas filiais ou socios dela.

2.—Os vocais elixidos por pertenceren en calidade de directivos dunha firma inscrita, cesarán no seu cargo ó cesaren como directivos da dita firma, aínda que seguiran vinculados ó sector por pasaren a outra empresa, procedéndose a designa-lo seu substituto na maneira establecida.

Artigo 32º

Ó presidente corresponde:

a) Representar ó consello regulador. Esta representación poderá delegala en calquera membro do consello, de maneira expresa, nos casos en que sexa necesario.

b) Facer cumpri-las disposicións legais e regulamentarias.

c) Administra-los ingresos e fondos do consello regulador e ordena-los pagamentos, en cumprimento dos acordos tomados ó respecto polo dito consello.

d) Convocar e presidi-las sesións do consello, sinalando a orde do día, sometendo á decisión deste os asuntos da súa competencia e executa-los acordos adoptados.

e) Contratar, suspender ou renova-lo persoal do consello regulador, logo de acordo deste.

f) Organizar e dirixi-los servicios.

g) Informar ós organismos superiores das incidencias que acaezan na produción e mercado.

h) Remitir á Consellería de Agricultura, Gandería e Montes da Xunta de Galicia aqueles acordos que, para cumprimento xeral, adopte o consello en virtude das atribucións que lle confire este regulamento e aqueles outros que pola súa importancia, coide que deban ser coñecidos por ela.

i) Aqueloutras funcións que o consello acorde ou lle encomende a Consellería de Agricultura, Gandería e Montes.

2.—A duración do mandato do presidente será de catro anos e poderá ser reelixido.

3.—O presidente cesará:

a) Ó espira-lo termo do seu mandato.

b) A petición propia unha vez aceptada a súa dimisión.

c) Por decisión da Consellería de Agricultura, Gandería e Montes da Xunta de Galicia, logo de incoación de expediente.

d) Polas demais causas recoñecidas no ordenamento xurídico.

4.—No caso de cesamento ou falecemento, o consello regulador, no prazo de un mes, propoñerá un candidato para a designación dun novo presidente.

5.—As sesións de constitución do consello regulador e as que teñan por obxecto a elección dun presidente serán presididas por unha mesa de idade, composta polo vocal de maior idade e os dous máis novos.

6.—O consello regulador quedará validamente constituído, cando estean presentes a totalidade dos seus membros e así o acorden por unanimidade.

Artigo 33º

1.—O consello reunirse cando o convoque o seu presidente, ben por propia iniciativa, ben por petición da metade dos vocais, sendo obrigatorio celebrar sesión, polo menos, unha vez por trimestre.

2.—As sesións do consello regulador convocaranse con oito días de antelación, polo menos, debendo xuntarse

á citación a orde do día para a reunión, na que non se poderán tratar máis asuntos que os previamente sinalados.

No caso de necesidade, cando así o requira a urxencia do asunto, a xuízo do presidente, citarase os vocais por medios telegráficos, con vinte e catro horas de anticipación como mínimo.

Para a inclusión na orde do día dun asunto determinado, non incorporado polo presidente, será necesario que o soliciten, polo menos, tres dos vocais con dereito a voto, con catro días de antelación como mínimo.

3.—Cando un titular non poida asistir a una sesión, notificarallo ó consello regulador.

4.—Os acordos do consello regulador adoptaranse por maioría dos membros presentes, e para que estes sexan válidos será necesario que concorran máis da metade dos seus membros con dereito a voto. O presidente terá voto de calidade.

5.—Para resolver cuestións de trámite, ou naqueles casos en que se considera necesario, poderá constituírse unha comisión permanente, que estará formada polo presidente do consello e dous vocais, un do sector elaborador e outro do sector gandeiro, designados polo pleno do consello regulador.

Na sesión en que se acorde a constitución da dita comisión permanente aprobaranse tamén as misións específicas que lle competen e as funcións que exercerá.

Tódalas resolucións que tome a comisión permanente serán comunicadas ó pleno do consello regulador na primeira reunión que este celebre.

Artigo 34º

1.—Para o cumprimento dos seus fins, o consello regulador contará co persoal necesario, conforme ós cadros de persoal aprobados polo consello regulador e que figuren dotados no seu presuposto.

2.—O consello regulador terá un secretario designado polo propio consello, por proposta do presidente, do que dependerá directamente, e que terá como cometidos específicos os seguintes:

a) Prepara-los traballos do consello e tramita-la execución dos seus acordos.

b) Asistir ás sesións con voz, pero sen voto, cursa-las convocatorias, levanta-las actas e custodia-los libros e documentos do consello.

c) Os asuntos relativos ó réxime interior do organismo, tanto de persoal como administrativos.

d) Actuar como instructor nos expedientes sancionadores, que resolverá o consello regulador.

e) As demais funcións que lle sexan encomendadas polo presidente relacionadas coa preparación e instrumentación dos asuntos da competencia do consello.

3.—Para as funcións técnicas que teñen encomendadas, o consello contará cos servicios necesarios.

4.—Para os servizos de control e vixilancia contará con inspectores propios. Estes inspectores serán designados polo consello regulador e habilitados pola Consellería de Agricultura, Gandería e Montes, coas seguintes atribucións inspectoras:

a) Sobre as ganderías situadas na zona de produción.

b) Sobre as queixerías e instalacións situadas nas zonas de produción, elaboración e maduración.

c) Sobre o leite e queixos na zona de produción, elaboración e maduración.

5.—O consello regulador poderá contratar, para efectuar traballos urxentes, o persoal necesario, sempre que teña aprobada no presuposto a dotación para este concepto.

6.—A todo o persoal do consello, tanto de carácter fixo como eventual, lle será de aplicación a lexislación laboral.

Artigo 35º

1.—O consello regulador establecerá un comité de cualificación dos queixos, formado por tres expertos e un delegado do presidente do consello, que terá como cometido informar sobre a calidade dos queixos que opten a ser protexidos pola denominación e sexan destinadas ó mercado, podendo contar este comité cos asesoramentos técnicos que coide necesarios.

2.—O presidente do consello, á vista dos informes do comité, resolverá o que proceda e, se é o caso, a descalificación provisional por dez días do queixo.

Se neste prazo o interesado solicita a revisión da resolución, esta deberá pasar ó pleno do consello regulador para resolve-lo que proceda. Se no dito prazo non se solicita a dita revisión a resolución do presidente considerárase firme.

Contra as resolucións do consello regulador poderase recorrer perante a Consellería de Agricultura, Gandería e Montes da Xunta de Galicia.

3.—O consello regulador dictará as normas precisas para a constitución e funcionamento do comité de cualificación.

Artigo 36º

1.—O financiamento das obrigas do consello efectuarase cos seguintes recursos:

1.1. Co produto das exaccións parafiscais que se fixan no artigo 90 da Lei 25/1970, ás que se aplicarán os tipos seguintes:

a) O 1% do valor do leite entregado ás queixerías insertas, e destinado á elaboración de *Queixo Tetilla*.

b) O 1% de exacción sobre o valor do produto amparado comercializado.

c) 100 pesetas por expedición de certificados e visados de facturas.

d) O dobre do prezo de custo das contraetiquetas ou precintos.

Os suxeitos pasivos de cada unha das exaccións son:

Da a) os titulares das ganderías inscritas.

Da b) os titulares das queixerías ou locais de maduración inscritos que expidan queixo amparado pola denominación ó mercado.

Da c) os titulares das firmas inscritas solicitantes de visados de facturas ou certificados.

Da d) os titulares das empresas solicitantes das exaccións.

1.2. As subvencións, legados e donativos que reciba.

1.3. As cantidades que puideran percibirse en concepto de indemnizacións por danos e perdas ocasionados ó consello ou ós intereses que representa.

1.4. Os bens que constitúen o seu patrimonio e os produtos e vendas del.

2.—Os tipos impositivos fixados neste artigo poderán ser variados pola Consellería de Agricultura, Gandería e Montes, por proposta do consello regulador, cando as necesidades presupostarias deste así o aconsellen.

3.—A xestión dos ingresos e gastos que figuren nos presupostos corresponde ó consello regulador.

4.—A aprobación dos presupostos do consello regulador e da súa contabilidade será realizada pola Consellería de Agricultura, Gandería e Montes, de acordo coas normas establecidas por este centro e coas atribucións e funcións que lle asigne a lexislación vixente na materia.

Artigo 37º

Os acordos do consello regulador que non teñan carácter particular e afecten a unha pluralidade de persoas ou empresas relacionadas coa produción ou elaboración de *Queixo Tetilla* notificaranse mediante circulares expostas nas oficinas do consello, e na maneira e lugares que considere máis eficaces para o seu coñecemento polos interesados.

Contra os acordos e resolucións que adopte o consello regulador poderase recorrer, en todo caso, perante a Consellería de Agricultura, Gandería e Montes da Xunta de Galicia, dentro do prazo de un mes, contado desde a comunicación daqueles.

Capítulo VIII

Das infraccións, sancións e procedemento

Artigo 38º

Tódalas actuacións que sexa preciso desenvolver en materia de expedientes sancionadores axustaranse ás normas deste regulamento, ás da Lei 25/1970, do 2 de

decembro, Estatuto da viña, do viño e dos alcois, ó Decreto 835/1972, do 23 de marzo, polo que se aproba o seu regulamento, ó Real decreto 1.945/1983, do 22 de xuño, que regula as infraccións e sancións en materia de defensa do consumidor e da produción agroalimentaria; á vixente Lei 30/1992, do 26 de novembro, de réxime xurídico das administracións públicas e do procedemento administrativo común e a cantas disposicións xerais sexan aplicables no momento sobre a materia.

En todo caso observaranse os principios e garantías recoñecidos polo ordenamento penal.

Para a aplicación da normativa anterior terase en conta o que establece o Real decreto 4.189/1982, do 29 de decembro, de traspaso de funcións e servizos da Administración do Estado á Comunidade Autónoma de Galicia en materia de denominacións de orixe, viticultura e enoloxía.

Artigo 39º

1.—As infraccións do disposto neste regulamento e dos acordos do consello regulador serán sancionadas con apercibimento, multa, comiso da mercadoría, suspensión temporal do uso da denominación ou baixa no rexistro ou rexistros desta, tal como se expresa nos artigos seguintes, sen prexuízo das sancións que por contravi-la lexislación xeral sobre a materia poidan ser impostas. Concorrendo diversas normas seguirase o establecido segundo os principios penais.

2.—As bases para a imposición de multas determinaranse conforme dispón o artigo 120 do Decreto 835/1972.

Artigo 40º

Segundo dispón o artigo 129.2º do Decreto 835/1972, as infraccións cometidas por persoas inscritas nalgún dos rexistros da denominación de orixe clasifícaranse, para efectos da súa sanción, como segue:

A) Faltas administrativas.

Sancionaranse con apercibimento ou con multa do 1 ó 10 por 100 do valor das mercadorías afectadas. Estas faltas son en xeral, as inexactitudes e omisións nas declaracións, asentos, libros de rexistro, volantes de circulación e outros documentos de control que garanten a calidade e orixe dos produtos e especialmente as seguintes:

1. Falsear ou omitir datos e comprobantes nos casos en que sexan requiridos para a inscrición nos diferentes rexistros.

2. Non comunicar inmediatamente ó consello regulador as variacións nos datos subministrados no momento da inscrición nos rexistros.

3. Omitir ou falsear datos relativos ás producións ou movementos de produtos.

4. As demais infraccións do regulamento ou dos acordos do consello regulador, na materia a que se refire este apartado A).

B) Infraccións do establecido no regulamento sobre produción, elaboración, maduración e características dos queixos amparados.

Sancionaranse con multas do 2 ó 20 por 100 do valor dos produtos afectados, podendo aplicarse, ademais, o comiso.

Estas infraccións son as seguintes:

1. Incumpri-las normas vixentes sobre prácticas de produción, conservación e transporte do leite.

2. Utilizar, para a elaboración de queixos que amparará a denominación, leite que non cumpra as condicións establecidas neste regulamento.

3. Incumpri-las normas de elaboración e maduración de queixos.

4. Empregar na elaboración do queixo que se vai a protexer, produtos non autorizados no regulamento.

5. As demais infraccións do disposto no regulamento ou dos acordos do consello regulador, na materia a que se refire este apartado B).

C) Infraccións por uso indebido da denominación de orixe ou por actos que poidan causarlle prexuízo ou desprestixio.

Sancionaranse con multas que irán desde vinte mil pesetas ó dobre do valor dos produtos afectados, cando aquel supere a dita cantidade, levando emparellado o comiso do produto en cuestión.

Estas infraccións son as seguintes:

1. Empregar razóns sociais, nomes comerciais, marcas, símbolos ou emblemas que fagan referencia á denominación ou ós nomes protexidos por ela, na comercialización de queixos non protexidos.

2. Emprega-la denominación de orixe para queixos que non foran elaborados, madurados e conservados conforme as normas establecidas pola lexislación vixente e por este regulamento, ou que non reúnan as condicións e características organolépticas que deban caracterizalos.

3. O uso indebido de nomes comerciais, marcas ou etiquetas non aprobadas polo consello regulador, nos casos a que se refire este apartado C).

4. A indebida tenza, negociación ou utilización dos documentos, etiquetas, selos, etc., propios da denominación, así como a falsificación deles.

5. Expedir queixos que non correspondan ás características de calidade mencionadas nos seus medios de comercialización.

6. A expedición, circulación ou comercialización de queixos amparados, en tipos de envases non aprobados polo consello regulador.

7. A expedición, circulación ou comercialización de queixos da denominación desprovistos das etiquetas numeradas ou carentes do medio de control establecido polo consello regulador.

8. Efectua-la elaboración, maduración ou o etiquetado en locais que non sexan as instalacións inscritas ou autorizadas polo consello regulador.

9. O non pagamento das exaccións parafiscais previstas neste regulamento por parte dos suxeitos pasivos de cada unha delas.

10. En xeral, calquera acto que contraveña o disposto neste regulamento ou os acordos do consello regulador e que prexudiquen ou desprestixien a denominación, ou supoña un uso indebido dela.

Artigo 41º

1.—Infraccións cometidas por persoas non inscritas nos rexistros do consello regulador.

a) Usar indebidamente a denominación de orixe.

b) Utilizar nomes comerciais, marcas, expresións, signos e emblemas que pola súa identidade ou similitude gráfica ou fonética cos nomes protexidos pola denominación de orixe, ou cos signos e emblemas característicos dela, poidan inducir a confusión sobre a natureza ou a orixe dos produtos, sen prexuízo dos dereitos adquiridos que sexan debidamente recoñecidos polos organismos competentes.

c) Emprega-los nomes xeográficos protexidos pola denominación de orixe en etiquetas, ou propaganda de produtos, aínda que vaian precedidos polos termos «tipo» ou outros análogos.

d) Calquera acción que cause prexuízo ou desprestixio á denominación ou tenda a producir confusión no consumidor respecto a ela.

2.—Estas infraccións sancionaranse con multa que irá desde vinte mil pesetas, ata o dobre do valor das mercaderías, cando este valor supere aquela cantidade, levando aparelado o seu comiso.

Artigo 42º

Para a aplicación das sancións previstas nos artigos anteriores, teranse en conta as seguintes normas:

1.—Aplicaranse no seu grao mínimo:

a) Cando se trate de simples irregularidades na observancia das regulamentacións, sen transcendencia directa para os consumidores ou que non supoñan beneficio especial para o infractor.

b) Cando os defectos se corrixan no prazo sinalado para isto, polo consello regulador.

2.—Aplicaranse no seu grao medio:

a) Cando se produza reiteración na negativa a facilitar información, prestar colaboración ou permiti-lo acceso á documentación esixida por este regulamento ou polos acordos do consello regulador.

b) Cando a infracción teña transcendencia directa sobre os consumidores ou supoña un beneficio especial para o infractor.

c) Cando os defectos non se corrixan no prazo sinalado polo consello regulador.

d) Cando a infracción se produza por unha actuación negligente, con inobservancia das normas de actuación expresamente acordadas polo consello regulador.

e) En tódolos casos nos que non proceda a aplicación dos graos mínimo ou máximo.

3.—Aplicarase no seu grao máximo:

a) Cando se probe manifesta mala fe.

b) Cando da infracción se deriven prexuízos graves para a denominación, os seus inscritos ou os consumidores.

4.—Nos casos das infraccións tipificadas no punto 5 do apartado B do artigo 40 e nos puntos 1, 2, 4, 7, 8 e 9 do apartado C do artigo 40, poderase aplica-la suspensión temporal do uso da denominación ou a baixa nos rexistros desta.

A suspensión temporal, non superior a tres meses, do dereito ó uso da denominación, levará emparellada a suspensión do dereito a obter certificados de orixe, precintos, contraetiquetas e demais documentos do consello regulador.

A baixa suporá a exclusión do infractor nos rexistros do consello e, como consecuencia, a perda dos dereitos inherentes á denominación.

Artigo 43º

No caso de reincidencia ou cando os produtos estean destinados á exportación, as multas serán superiores nun 50 por 100 ás máximas sinaladas neste regulamento.

No caso de que o réincidente cometera nova infracción, as multas poderán elevarse ata o triple dos máximos establecidos neste regulamento.

Artigo 44º

1.—A resolución dos expedientes incoados corresponderá ó consello regulador, cando o infractor estea inscrito nalgún dos rexistros e a sanción non exceda de cincuenta mil pesetas. Nos demais casos, o consello regulador poñerase en coñecemento e trasladará as actuacións á Consellería de Agricultura, Gandería e Montes ou ó organismo competente.

2.—Nos expedientes de carácter sancionador incoados polo consello regulador deberá actuar como instructor, o secretario do consello e como secretario, o letrado do consello regulador ou, caso de non habelo, unha persoa ó seu servizo.

3.—A decisión do comiso definitivo de produtos e destino destes corresponderá a quen teña atribuída a facultade de resolve-lo expediente.

Artigo 45º

Nos casos nos que a infracción corresponda ó uso indebido da denominación, o consello regulador, sen prexuízo das actuacións e sancións administrativas oportunas, poderá acudir ós tribunais, exercendo as accións civís e penais recoñecidas na lexislación sobre a propiedade industrial.